

Date – 26/12/2025

Time - 18:30 -18:40Hrs

AKASHVANI AIZAWL

HEADLINES (EVENING)

1. Mizote Krismas lawmna a tel ngei ngei, veng/khaw tina kohhran hrang hrang tam berah vawiin hian Krismas ruai theh a ni.
2. Esther Hnamte in India rama naupang chawimawina sang ber Pradhan Mantri Rashtriya Bal Puraskar chu President Droupadi Murmu hnen atangin a dawng.
3. Home minister Pu K. Sapdanga chuan ruihhlo do beihpui thlak mek chu ngawrh leh zuala kalpui chhonzawm a nih dawn thu a sawi.
4. Cheng 5-a chaw ei theihna tur Atal Canteen, New Delhi-ah hawn a ni.

<><><>

CHRISTMAS FEASTS

Mizote Krismas lawmna a tel ngei ngei, veng/khaw tina kohhran hrang hrang tam berah vawiin hian Krismas ruai theh a ni.

Aizawlah chuan tukin zing hma takah fatu turte chhuak khawmin ran talh leh sa chan bakah tlang ruai atana eitur dangte buatsaihin vengtinah ruai tur an buatsaih a. Ruai hi vawiin tlai lamah theh a ni a. Niminah khan hmun thenkhatah chuan kohhran tam vak lovin Krismas ruai hi an theh tawh a, nimina theh tawh vawiina ruai nawn leh pawh an awm a. Vawiinah hian kohhran tam ber chuan ruai an theh a ni. Ruai atan hian bawng, sial leh vawk an talh ber a, hetiang sa ei thei lote tan ar leh sangha te an siam bawk. Tun lai thangthar zingah sa ei lo, thlai chauh ei an tam tawh avangin thlai lam pawh chi hrang hrang an siam a ni. Ruai theh hma leh zan lama lengkhawm zui tur pawh kohhran thahnem tak an awm a ni.

Lunglei-ah pawh Krismas ruai theh tur hian zing atangin an inbuatsaih a. Lunglei a kan Corr. Thanghmingliana Renthlei hnena bawng chaw luttu ber pakhat leh Butcher Association a an hruiatu Pu H.Zairemmawia'n a hrilh danin Lunglei khawpum a Kohhran hrang hrang te hian vawi khat ruaitheh na'n hian Bawng 20-25 vel an talh ang a chhut a ni a. Bawng pakhat hi a tlangpuiin Rs nuai khat sing thum man vel a ni a ti a. Lunglei khawpui chhungah veng 23 vel a awm a, bawng manah cheng nuai 29 leh sing 9 vel senral thin anga chhut a ni a. Vawk, ar, sangha, thlai leh thil dang senso nena chhut chuan cheng nuai 60 chuang vel zen zawn sen ral thin a ni. Thleng leh no tawih thei lo hmang lo tura inzirtirna a nasa hle chungin ruaitheh na'n hian dispo thleng hmang an tam zawk niin a lang. Thir hmanga siam, damdawiin thleng ang deuh hmang an awm nual bawk. Damdawiin leh Police station awmna venga Kohhran lian zawkte chuan kumdang ang bawkin damlo leh Police te Masi ruai an suah a ni.

Champhai District ah Kohhran tam zawkin vawiin hian Krismas lawmna ruai an theh a. Nimin lam khan kohhran thehkhat chuan Krismas lawmna ruai kilin vawiina ruai nawn te pawh an awm. Nimin, nizan leh vawiin thlengin Champhai District ah buaina leh harsatna awm lovin Krismas lawmna hun hman a niin kohhran ten programme an duan sa dungzuiin inkhawm leh lengkhawm te an buatsaih a. Zaninah kohhran ten inkhawm nei chhunzawmin lenkhawm zawh rualin Krismas lawmna chu an tiak tlangpui tawh dawn a ni.

Serchhip leh a chheh velah pawh Krismas lawmna ruai theh a ni a. Kohhran tam ber chuan vawiin khan krismas lawmna ruai hi thehin, nimin krismas ni khan Serchhip Kawnpui kohhranah nu kum 70 vel mi thi a awm tih loh chu khawtlangah Krismas lawmna boruak tibuaitu dang a awm lo.

Vawiin khan Kolasib a kohhran hrang hrangte chuan Christmas ruai an theh a, nimin lama ruai theh Catholic kohhran, Independent Church of India (ICI) leh Reformed Presbyterian Church (RPC) te pawhin vawiin hian Christmas ruai an nawn a ni.

<><><>

TOURISTS

Kumin Krismas vuakvetah Mizoram, a bikin Aizawl khawpui-ah hnam dang khualzin (tourists) an pung nasa hle.

Tourism minister Pu Lalnghinglova Hmar hnena atanga thu dawn danin kumin November thla chawhnu lam atang khan Aizawl leh a chhehvela mikhual thlenna hmun hotel leh homestay tam zawk hi a khat reng a, Krismas hma deuh khan homestay neitute hian an khah tawh hlawm avangin mikhual thleng thei an awm leh awm loh an inzawt kual nasa hle ni a thu dawn a ni. Mikhual thlenna nei lo an tam em avangin, Paying Guest/Hostel a awmte Krismas chawlh hmanga an khaw lama an haw avangin hetiang neitute chuan an hostel-te mikhual thlen theih turin an siam rem bawk a ni.

Nimin Krismas ni khan Aizawla kohhran hrang hrang biak-inah hnam dang khualzin hmuh tur an thahnem hle a, kohhran thenkhat chuan an puala inlawmna (greetings) hian pawh biak inah an sawi chhuak nghe nghe a. Dawrpui Presbyterian kohhran biak-inah pawh Krismas lawmna inkhawmah hnam dang khualzin mi 30 chuang an inkhawm ni a thu dawn a ni. He'ng khualzinte hian vawiinah Krismas ruaite thehin Aizawl chhehvel khualzin tlawh thin hmun hrang hrang an tlawh dawn a. A bikin Reiek tlang, Sakawrhmutuai tlang, Hangilunglengtlang leh Chawlhmun a Solomon's Temple te hi a tlawh hlawh zual tura ngaih a ni.

Tourism Department hian sorkar laipua Ministry of Tourism nen khualzin hipna turin December 15-20 khan Lammualah Winter Festival an buatsaih tawh a, December 23 khan Aizawlah Krismas Parade buatsaihin December 31 hian a huhova tlai ni tla tur thlir paha rimawi nena intihlimna, Sakawrhmutuai Sunset ti a vuah chu an buatsaih dawn a; January ni 6 leh ni 7 hian Phuaibuang Tlaizawng Paradise an buatsaih dawn bawk a, January 6-ah Tuivai luiah nghakuai chiah runpui an buatsaih ang a, Phuaibuangah adventure tourism lam hawi programme leh rimawi nen hun hman a ni ang.

<><><>

AWARD

Mizo naupang zaithiam Esther Lalduhawmi Hnamte chuan India rama naupang chawimawina sang ber Pradhan Mantri Rashtriya Bal Puraskar chu President Droupadi Murmu hnen atangin a dawng.

Vawiin khan he chawimawina semchhuahna hun hi New Delhi-a Vigyan Bhavan-ah buatsaih a ni a, ramchhunga state 18 a naupang 20 in he chawimawina hi an dawng a ni. Pradhan Mantri Rashtriya Bal Puraskar chawimawina hi naupang huaisente, sports lama mi chungnung bik te, Computer leh AI lama thiamna nei bikte leh performing Arts lama thiamna nei bikte hnenah kumtina hlan thin a ni. Esther Lalduhawmi Hnamte hi hriat theih chinah Mizo naupang he chawimawina dawng hmasa ber a ni a. Chawimawina sem zawh hnu hian chawhnu dar 12.30 atangin New Delhi a Bharat Mandapam-ah ram pum huap naupangte pual inkhawm Veer Bal Diwas 2025 hun hman zui a ni a. Hetah hian Prime Minister Narendra Modi chuan thu a sawi bakah Union Minister for Women and Child Development Pi Annpurna Devi chuan thu a sawi bawk a ni. He mi hnu hian Ashoka Hotel-ah chaw an ei khawm leh dawn a ni.

Mizoram Larsap General Vijay Kumar Singh chuan Esther Lalduhawmi Hnamte in zai hmanga Pradhan Mantri Rashtriya Bal Puraskar chawimawina a dawng thei chu a lawmpui thu leh a hla sakte chuan rampum a fanchhuah thu a sawi a. A chawimawina dawn chu Mizoram leh ramchhung tana entawntlak leh ngaihhlut awm tak a ni a ti a. Women & Child Development Minister Pi Lalrinpuii pawhin Esther Lalduhawmi Hnamte chu naupang chhuanawm tak zinga thlanchhuah a ni chu a lawmpui thu leh Estheri chu India hnam hla ‘Vande Mataram’ kum 4 mi lek a nih laia a sak, India ram puma ngaithlatu leh hluttu mi maktaduai tel a neih avanga he chawimawina hi dawng thei a ni a ti.

Lunglei College venga cheng, Esther Hnamte tia hriat lar hi India hnam hla ‘Vande Mataram’ tih hla a sak atangin ramchhungah hriat a hlawh chho a hlawh chho tan a, vawiina chawimawina a dawnnaah hian a nu leh a putea te’n an tawiawm a ni. Pradhan Mantri Rashtriya Bal Puraskar chawimawina hi Ministry of Women and Child Development-in naupang theihna chungchuang neite hnena kumtina a hlan thin a ni.
Byte: R. Lalawmpuii, Esther Hnamte nu

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

OPERATION JERICHO

Home minister Pu K. Sapdanga chuan ruihhlo do beihpui thlak mek chu ngawrh leh zuala kalpui chhunzawm a nih dawn thu a sawi.

Pu K. Sapdanga'n Akashvani Aizawl news a hrilh danin December ni 31 thlenga kalpui tura lo ruahman Operation Jericho chu March ni 31 thleng kalpui tura thutlukna siam a nih rualin Myanmar atanga ruihhlo tawlhurutute'n an rawn luhna khan hman thin an thlak nasa hle niin a sawi a. A bik takin Champhai district atanga ruihhlo tawlh thinte chuan an kalkhan ngai an thlak bakah Manipur lama kual a, Mizorama ruihhlo tam tham rawn tawlh luh an tum ni a report a awm avangin Manipur ramri lamah Police dah belh tura ruahmanna siam a nih thu a sawi a. Ngopa lam leh Tipaimukh lama Tuivai lei pahnih leh hmun dang a luh theihnate pawh ngawrh leh zuala ven a nih tur thu home minister chuan a sawi a. He tih lai hian chhim lam, Lawngtlai leh Siaha district lama kaw hreuh an tum ni a thu an dawn bawhzui-in district bawrhsapte chu Central Young Lai Association (CYLA) leh Mara thalai pawl (MTP) te nena tangrual a, ruihhlo tam tham lo lut thei dang tura theihtawpa tan la tura hriattir an nih tawh thu home minister hian a sawi bawh a ni.

Ruihhlo do beihpui thlak mek, Operation Jericho ti a vuah hi September ni 1 atanga kalpui tan kha a ni a. Myanmar nena ramri a ruihhlo tawlhurutute lo luh thinna khanah Police leh a bul hnai khua a tlawmngai pawh branch-te ngawrh takin an duty a, Mizoramah ruihhlo a van bakah a man pawh a to phah hle ni a hriat a ni. He tiang hi a nih avangin December ni 22 a home minister leh excise & narcotics minister hova central YMA hruaitute thukhawm chuan, December ni 31 thleng kalpui tura ruahman Operation Jericho chu pawt sei a, nakum March thla tawp thleng kalpui ni se tiin thutlukna an siam ta a ni.

Operation Jericho kalpui meka ruahmanna pa khat angin CYMA, Police leh Excise & Narcotics hnathawkte chuan tun hnai khan ualau taka damdawi hmang mi 100 zet khawmin, eitur an pek hnu-ah, Tawngtai Bethel Camping Centre-ah an dahlut a ni.

ATAL CANTEEN INAUGURATED

Nimin, Prime Minister hlui Atal Bihari Vajpayee-a pianchampha 101-na hriatreng nan Delhi Chief Minister Rekha Gupta leh Union Minister, Manohar Lal-a ten vawiin khan Delhi khawpuiah ei inna hmun, Atal Canteen an hawng. Thu sawiin Delhi Chief Minister chuan Atal Canteen chu mamawhtute leh hnathawka awmte tana cheng 5 leka chaw an lam theihna tura ruahman a ni, a ti a, vawiin atangin canteen 45 hawn a nih thu leh ni 15 chhungin canteen 55 dang hawn leh a nih tur thu a sawi bawh.

Union Minister Mahonar Lal-a pawhin mi maktaduai tam takin an chhawr tangkai theih tur scheme anih thu sawiin Atal Bihari Vajpayee-a duhthu sam, tumah riltamin an mu tur a ni lo tihhlawhtlinna tur a ni, a ti.



TRIPURA ASSEMBLY SPEAKER DIES

Tripura Assembly Speaker, Biswa Bandhu Sen-a chu vawiin khan Bengaluru-a private damdawi in pakhtatah a thi a, kum 72-a upa a ni. Pu Sen-a hi stroke vangin damdawi in-ah hian enkawl a ni a, a nupui leh fapa 1 leh fanu 1 a kalsan a ni.

Prime Minister Narendra Modi-a chuan Biswa Bandhu Sen a thi chu paw i a tih thu sawiin a chhungte hnenah tawrhpuina a hlan a, Pu Sen-a chu Tripura hmasawna tur leh vantlang tana a hnathawh hrang hrangte avangin hriat reng a ni ang, a ti.

Lok Sabha Speaker Om Birla leh Union Home Minister, Amit Shah-te pawhin Pu Sen-a thi chu paw i an tih thu an tarlang a ni.

<><><>